



La presidenta da la vischnanca da Domat, Beatrice Baselgia flancada dad Urs Schädler (san.), il president da l'Uniuon grischuna d'artisanadi e mastergn e cusseglier guvernativ Hansjörg Trachsel.

FOTOS G. N. STGIER

«Investar e na consumar»

Domat: Radunanza da l'Uniuon grischuna d'artisanadi e mastergn

DA GION NUTEGN STGIER / ANR

■ Ina reduziun da la taglia d'impressas pretenda il president da l'uniun Urs Schädler. Ultra da quai saja da reducir las subvenziuns per l'energia solara e da vent e sustegnair l'energia idraulica. Il premi d'innovaziun 2013 ha l'uniun surdà a Jürg Zingg da Domat, il patrun d'ina interpresa d'orticultura. Da las numerusas uniuns e federaziuns che nus avain en noss chantun è segir l'Uniuon grischuna d'artisanadi e mastergn ina da las pli impurtantas. Quella uniun cun 7000 commembers che derivan da 70 secziuns ed associaziuns professiunalas è in dals motors da l'economia grischuna. A Domat ha gi lieu la radunanza da delegads cun 120 preschents e radund 60 giasts da la politica, da l'economia e dal turissem. Per l'organisaziun da la radunanza da delegads è stada responsabla l'Uniuon d'artisanadi e mastergn dal Plaun. Beatrice Baselgia, la presidenta da la vischnanca da Domat, ha ditg en ses pled da bainvegni che per il lieu saja quai ina onur che l'uniun cun bliers impressaris, che procuran er per numerusas plazzas da lavur, haja tschernì Domat sco lieu per salvar sia radunanza da delegads.

Consequenzas gravantas

Tar l'iniziativa da las abitaziuns secundaras e la lescha davart la planisaziun dal

territori sajan ils giavischs dal Grischun vegnids maiorisads, ha ditg Urs Schädler, il president da l'Uniuon grischuna d'artisanadi e mastergn, a l'entschatta da ses rapport annual. Cun s'augmentar la pressiuon sin la Svizra quai che pertutga la cunvegna fiscal e cun eventualmain vegnir dismiss il privilegi da taglia, publitgar las datas da banca vegnia qua tras restrenschida la fugia da taglia en Svizra. Il Grischun saja en quella chaussa impusant, ha ditg Urs Schädler. Ultra da quai vegnia indebli il turissem e quai saja il cas er tar l'industria d'export. Tuts quels fatgs hajan consequenzas gravantas per regiuns turisticas e regiuns periferas, è Urs Schädler persvadi. El vul dentant er che l'energia solara e dal vent vegnia betg subvenziunada en l'avegnir en in tala dimensiun. Meglier saja da sustegnair e promover l'energia idraulica, perge l'aua saja ina da las paucas resursas grischunas cun in grond potenzial. Per che las interpresas grischunas sappian esser en l'avegnir abla da concurrer saja ina reduziun da la taglia d'interpresas indispensabla, ha accentuà Urs Schädler. Tuts quels chantuns che hajan reduci quella imposta hajan profità ferm, ha ditg il president dals impressaris grischuns.

«Fiutscher in vair success»

Jürg Michel, il directur da l'Uniuon grischuna d'artisanadi e mastergn, ha en ses pled tranter auter er ditg che la segunda

exposiziun professiunala «Fiutscher» saja stada in vair success. 4000 scolars e 7000 autras persunas haja l'occurranza attratg. Cun quella vegn cuntinuà e la proxima ha lieu dals 4 fin ils 9 da november 2014 e quai danovamain a Cuira. Preschentà ed approvà è dentant er vegnì il quint annual da l'uniun che serra tar entradas dad 1,731 milliuns francs ed expensas dad 1,700 milliuns francs cun in gudogn da stgars 3000 francs. Giast tar la radunanza da delegads da l'Uniuon grischuna d'artisanadi e mastergn a Domat è er stà cusseglier guvernativ e schef da l'economia publica, Hansjörg Trachsel. El ha cunzunt ditg che tar las votaziuns pertutgant l'iniziativa da las abitaziuns secundaras, da la taxa turistica unifitgada e dals Gieus olimpics Grischun 2022 saja il suveran stà malsegir ed haja gi memia pauca confidenza. Quels dus aspects hajan ils adversaris da las votaziuns nizzegià ed a la fin er stads ils victurs. Ussa saja da dar cuntrapausa ed er esser pront d'acceptar in tschert risico. Hansjörg Trachsel ha er ditg ch'in pensum da la politica e l'economia saja ussa da gudagnar puspè la confidenza dal pievel, s'engaschar a lunga vista ed avair la tenuta: investar e na consumar. A la fin da la radunanza da delegads ha Jürg Zingg, che maina a Domat in menaschi d'orticultura cun 50 emploiads, retschet il premi d'innovaziun 2013 da l'uniun ch'è dotà cun 3000 francs.



Politica ed economia unida: cusseglier nazional Martin Candinas, Alois Vinzens, directur Banca chantunala e Hans Hatz, president Banca chantunala (da san.).



Ils purtaders dal premi d'innovaziun Maria Eva e Jürg Zingg cun Jürg Michel, il directur da l'Uniuon grischuna d'artisanadi e mastergn (da san.).



Trais buns impressaris sursilvans: Hubert Carigiet, Ciril Collenberg e Victor Flepp (da san.).



Er stads a Domat en da la Surselva e da Surmeir Gioni Capaul, Seraina Cadetg e Vendelin Coray (da san.).



Il hotelier ed ustier Rudolf Pazeller (san.) ed il pasterner Mario Baselgia.



Ina runda cun impressaris engiadinais e da la Val Müstair: Godi Hohenegger, Ruth Fratschöl e Claudio Andry (da san.).